

**საჯარო სამართლის იურიდიული პირი -  
ბათუმის შოთა რუსთაველის სახელმწიფო უნივერსიტეტი**

**ბრძანება N01-02/146**

ქ. ბათუმი

13 ნოემბერი, 2020 წ.

**2020-2021 სასწავლო წლიდან ბსუ-ს დიპლომირებული მედიკოსის ინგლისურენოვან  
საგანმანათლებლო პროგრამაზე ჩარიცხვის უფლებამოსილებულ პირებთან  
გასაფორმებელი ხელშეკრულების ფორმის დამტკიცების შესახებ**

„უმაღლესი განათლების შესახებ“ საქართველოს კანონის 22-ე მუხლის, ბსუ-ს წესდების მე-13, 66-70-ე მუხლების, „ბსუ-ს სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის №111 დადგენილების, „ბსუ-ს საბუნებისმეტყველო მეცნიერებებისა და ჯანდაცვის ფაკულტეტის დიპლომირებული მედიკოსის საგანმანათლებლო პროგრამის (ინგლისურენოვანი) დამტკიცების შესახებ“ ბსუ-ს აკადემიური საბჭოს 2019 წლის 22 აგვისტოს N06-01/105 დადგენილების, „ბსუ-ს საბუნებისმეტყველო და ჯანდაცვის ფაკულტეტზე დიპლომირებული მედიკოსის ინგლისურენოვან საგანმანათლებლო პროგრამაზე სწავლის საფასურის განსაზღვრის თაობაზე“ ბსუ-ს წარმომადგენლობითი საბჭოს 2019 წლის 11 ოქტომბრის N07-01/44 გადაწყვეტილების, „საჯარო სამართლის იურიდიული პირის - ბათუმის შოთა რუსთაველის სახელმწიფო უნივერსიტეტის სტუდენტთა სწავლის საფასურის გადახდის წესის დამტკიცების შესახებ ბსუ-ს წარმომადგენლობითი საბჭოს 2015 წლის 29 სექტემბრის N6 გადაწყვეტილების, „ბსუ-ს უცხოენოვან საგანმანათლებლო პროგრამაზე სწავლის საფასურის გადახდის წესის დამტკიცების თაობაზე“ ბსუ-ს წარმომადგენლობითი საბჭოს 2019 წლის 22 ნოემბრის №07-01/47 გადაწყვეტილების, „უმაღლეს საგანმანათლებლო დაწესებულებაში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების მიერ დოკუმენტების წარდგენისა და განხილვის წესის დამტკიცების შესახებ“ საქართველოს განათლებისა და მეცნიერების მინისტრის 2011 წლის 29 დეკემბრის N224/მ ბრძანების, „ბსუ-ში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების ჩარიცხვის წესის დამტკიცების შესახებ“ ბსუ-ს აკადემიური საბჭოს 2018 წლის 1 მარტის N34 დადგენილების საფუძველზე

**ვ ბ რ ძ ა ნ ე ბ :**

1. დამტკიცდეს ბსუ-ს „დიპლომირებული მედიკოსის“ ინგლისურენოვან საგანმანათლებლო პროგრამაზე ჩარიცხვის უფლებამოსეულ პირებთან გასაფორმებელი ხელშეკრულების თანდართული ფორმა (დანართი 1).
2. წინამდებარე ბრძანებით დამტკიცებული ფორმის შესაბამისად ხელშეკრულება გაფორმდეს ბსუ-ს აკადემიური საბჭოს 2018 წლის 1 მარტის N34 დადგენილებით დამტკიცებული „ბსუ-ში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების ჩარიცხვის წესისა“ და „ბსუ-ს სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის №111 დადგენილების 5<sup>2</sup> მუხლის („ერთიანი ეროვნული/სამაგისტრო გამოცდის ჩაბარების გარეშე ბსუ-ში ჩარიცხვა და სასწავლო პროცესი“) მოთხოვნათა დაცვით.
3. წინამდებარე ბრძანებით დამტკიცებული ხელშეკრულების ფორმა ითარგმნოს ინგლისურ ენაზე (გადაეგზავნოს თარჯიმანს).
4. წინამდებარე ბრძანებით დამტკიცებული ხელშეკრულების ფორმის გაცნობა ბსუ-ში სწავლით დაინტერესებული პირებისათვის და ასევე უცხოელი აბიტურიენტების მოზიდვის მიზნით გაფორმებული მემორანდუმის მე-2 მხარისათვის - ე.წ. „კომპანია“ (ასეთის არსებობის შემთხვევაში) გაცნობა, უზრუნველყოს ბსუ-ს სტრატეგიული განვითარებისა და საგარეო ურთიერთობათა დეპარტამენტმა.
5. ბრძანება სახელმძღვანელოდ და აღსასრულებლად დაეგზავნოს ბსუ-ს ადმინისტრაციის ხელმძღვანელს, რექტორის მოადგილეს (თ. სირაძე), ბსუ-ს საბუნებისმეტყველო მეცნიერებათა და ჯანდაცვის ფაკულტეტს, სტრატეგიული განვითარებისა და საგარეო ურთიერთობათა დეპარტამენტს, სტუდენტთა კარიერული განვითარების, კულტურისა და სპორტის დეპარტამენტს, ხარისხის უზრუნველყოფის სამსახურს, სასწავლო პროცესის დეპარტამენტს, იურიდიულ დეპარტამენტს, ბსუ-ს საინფორმაციო ტექნოლოგიების სამსახურს და ნანა მაზმიშვილს.
6. ბრძანება ძალაშია ხელმოწერისთანავე.

რექტორი, ასოცირებული პროფესორი

 მერაბ ხალვაში

ხელშეკრულება №

ქ. ბათუმი

„\_\_\_“ \_\_\_\_\_ „\_\_\_“ \_\_\_ წ.

ერთი მხრივ საჯარო სამართლის იურიდიული პირი – ბათუმის შოთა რუსთაველის სახელმწიფო უნივერსიტეტი (შემდგომში „უნივერსიტეტი“ ან „ბსუ“), წარმოდგენილი უნივერსიტეტის რექტორის ----- მიერ და მეორე მხრივ ფიზიკური პირი -----  
---(შემდგომში „სტუდენტი“) ვდებთ წინამდებარე ხელშეკრულებას შემდეგზე:

მუხლი 1. ხელშეკრულების საგანი

ხელშეკრულების საგანია უნივერსიტეტსა და -----  
ფაკულტეტის -----

„დიპლომირებული მედიკოსის“ ერთსაფეხურიანი (ინგლისურენოვანი) საგანმანათლებლო პროგრამის (შემდეგში - „პროგრამა“) სტუდენტს შორის ურთიერთობის რეგულაცია.

მუხლი 2. მხარეთა უფლებები და მოვალეობები

2.1. მხარეთა უფლება-მოვალეობები განისაზღვრება წინამდებარე ხელშეკრულებით, საქართველოს კანონმდებლობით, უნივერსიტეტის წესდებით, შინაგანაწესით, ეთიკის კოდექსით, უნივერსიტეტის სასწავლო პროცესის მარეგულირებელი სამართლებრივი აქტებით, სწავლის საფასურის გადახდის წესითა და სხვა აქტებით.

2.2. სტუდენტი წინამდებარე ხელშეკრულებაზე ხელმოწერით ადასტურებს, რომ გაცნობილია უნივერსიტეტის ვებგვერდზე (ინგლისურენოვან ველში) განთავსებულ ბსუ-ს ეთიკის კოდექსს, ბსუ-ს შინაგანაწესს, ბსუ-ს წარმომადგენლობითი საბჭოს 2019 წლის 22 ნოემბრის №07-01/47 გადაწყვეტილებით დამტკიცებულ „ბსუ-ს უცხოენოვან საგანმანათლებლო პროგრამაზე სწავლის საფასურის გადახდის წესს“ (შემდეგში - „სწავლის საფასურის გადახდის წესი“), ასევე „სტუდენტის გზამკვლევი“ განთავსებულ სხვა სამართლებრივ აქტებს და კისრულობს ვალდებულებას:

ა) შეასრულოს შესაბამისი საგანმანათლებლო პროგრამის სასწავლო გეგმის მოთხოვნები და ამ მიზნით, ბსუ-ს სამართლებრივი აქტებით დადგენილ ვადაში გაიაროს აკადემიური რეგისტრაცია (დაარეგისტრიროს სავალდებულო და არჩევითი სასწავლო კურსები) და შეასრულოს სასწავლო კურსების სილაბუსებით გათვალისწინებული სამუშაო;

ბ) გადაიხადოს უნივერსიტეტში სწავლის საფასური (გაიაროს ადმინისტრაციული რეგისტრაცია) ბსუ-ს სამართლებრივი აქტებით დადგენილ ვადაში და „სწავლის საფასურის გადახდის წესის“ შესაბამისად;

გ) ისარგებლოს „სასწავლო პროცესის მართვის ელექტრონული სისტემით“/„სტუდენტური პორტალით“/ ბსუ-ს სასწავლო პროცესის ადმინისტრირებისათვის განსაზღვრული სხვა ელექტრონული სერვისებით, რომლის საშუალებით მას მიეწოდება უნივერსიტეტის შეტყობინებები ან/და ინფორმაცია, სასწავლო პროცესის მიმდინარეობისა და შესაბამისი სამართლებრივი აქტების გამოცემის თაობაზე;

დ) უნივერსიტეტთან კომუნიკაციისათვის (ინფორმაციის, ცნობების მიღება) ისარგებლოს ბსუ-ს ოფიციალური ფოსტით, სტუდენტური პორტალით და პირადი მონაცემების

ცვლილების შემთხვევაში წარმოადგინოს ინფორმაცია, მის პირად საქმეში და სტუდენტურ პორტალზე/ელექტრონულ სისტემაში პირად პროფილში ასახვის მიზნით;

ე) გაეცნოს უნივერსიტეტის სამართლებრივ აქტებს (აისახება „სტუდენტის გზამკვლევი“/ განთავსდება უნივერსიტეტის შესაბამისი ფაკულტეტის საინფორმაციო დაფაზე/სასწავლო პროცესის მართვის ელექტრონულ სისტემაში/სტუდენტურ პორტალზე/ კანცელარიასთან არსებულ საინფორმაციო დაფაზე/ უნივერსიტეტის ვებგვერდზე ([www.bsu.edu.ge](http://www.bsu.edu.ge));

ვ) სარგებლობისას გაუფრთხილდეს უნივერსიტეტის ქონებას;

ზ) იყოს დაზღვეული საქართველოს მთავრობის 2020 წლის 10 სექტემბრის N572 დადგენილებით დამტკიცებული პირობების შესაბამისად და უნივერსიტეტის მიერ დადგენილ ვადაში გადაიხადოს უნივერსიტეტის მიერ სტუდენტის სავალდებულო დაზღვევისათვის გადახდილი (შესყიდული მომსახურების) საფასური;

თ) ჯეროვნად შეასრულოს ამ ხელშეკრულებით, უნივერსიტეტის აქტებითა და საქართველოს კანონმდებლობით განსაზღვრული სხვა ვალდებულებები.

### 2.3. სტუდენტი უფლებამოსილია:

ა) უნივერსიტეტისაგან მიიღოს საგანმანათლებლო პროგრამის შესაბამისი და ხარისხიანი საგანმანათლებლო მომსახურება, ასევე მონაწილეობა მიიღოს სამეცნიერო-კვლევით საქმიანობაში;

ბ) უნივერსიტეტის სამართლებრივი აქტებით დადგენილი წესით ისარგებლოს უნივერსიტეტის მატერიალურ-ტექნიკური ბაზით, ბიბლიოთეკით, საინფორმაციო და სხვა საშუალებებით;

გ) საქართველოს მოქმედი კანონმდებლობითა და ბსუ-ს სამართლებრივი აქტების შესაბამისად შეიწყვიტოს ან შეიჩეროს სტუდენტის სტატუსი, ისარგებლოს მობილობის უფლებით;

2.4. სტუდენტი თანახმაა მისი პერსონალური მონაცემები დამუშავებული იქნეს ბსუ-ს მიერ, წინამდებარე ხელშეკრულების მიზნებიდან და სხვა კანონიერი საჭიროებიდან გამომდინარე (სტუდენტურ პორტალზე/სასწავლო პროცესის მართვის ელექტრონულ სისტემაში და ან/და სხვა ელექტრონულ სერვისებზე განთავსება და სხვა).

### 2.5. უნივერსიტეტი ვალდებულია უზრუნველყოს სტუდენტი:

ა) ხარისხიანი განათლებით;

ბ) სამეცნიერო კვლევაში მონაწილეობით;

გ) სწავლისათვის აუცილებელი მატერიალურ-ტექნიკური ბაზით, ბიბლიოთეკით, საინფორმაციო და სხვა საშუალებებით;

დ) უნივერსიტეტის პერსონალის შეფასებაში მონაწილეობის უფლებით;

ე) საქართველოს კანონმდებლობით, „უმაღლესი განათლების შესახებ“ საქართველოს კანონით, უნივერსიტეტის წესდებითა და სხვა აქტებით მინიჭებული უფლებებით.

## მუხლი 3. სწავლის საფასური, აკადემიური და ადმინისტრაციული რეგისტრაცია

3.1. სტუდენტის სწავლის საფასური (ერთი სასწავლო წლისათვის) შეადგენს 4 000 (ოთხი ათასი) აშშ დოლარს.

3.2. სტუდენტი ვალდებულია ყოველწლიურად გაიაროს ადმინისტრაციული რეგისტრაცია - გადაიხადოს პროგრამაზე სწავლის წლიური საფასური, კერძოდ:

ა) პირველი სასწავლო წლის საფასური - უცხოელი აბიტურიენტის ერთიანი ეროვნული გამოცდების გავლის გარეშე ბსუ-ს პროგრამაზე ჩარიცხვის უფლების მოპოვების შესახებ საქართველოს განათლების, მეცნიერების, კულტურისა და სპორტის მინისტრის ბრძანების გამოცემის შემდეგ, ბსუ-ს აკადემიური საბჭოს 2015 წლის N111 დადგენილების 5<sup>2</sup> მუხლის („ერთიანი ეროვნული/სამაგისტრო გამოცდის ჩაბარების გარეშე ბსუ-ში ჩარიცხვა და სასწავლო პროცესი“) მოთხოვნათა დაცვით წინამდებარე ხელშეკრულების გაფორმებისთანავე;

ბ) ბსუ-ში სწავლის ყოველი მომდევნო სასწავლო წლის საფასური - გადახდილი უნდა იქნეს (ადმინისტრაციული რეგისტრაცია გავლილი უნდა იქნეს) წინა სასწავლო წლის დასრულებისთანავე, მაგრამ არაუგვიანეს ახალი სასწავლო წლის დაწყებამდე ერთი თვისა (თუკი ბსუ-ს რექტორის ბრძანებით ან/და ამ სტუდენტის მოზიდვის შესახებ შესაბამის კომპანიასთან გაფორმებული მემორანდუმით სხვა ვადა არ არის გათვალისწინებული. აღნიშნული მემორანდუმის პირობები განიხილება წინამდებარე ხელშეკრულების განუყოფელ ნაწილად).

3.3. სტუდენტის სწავლის საფასურის გადახდისათვის გამოიყენება შემდეგი საბანკო რეკვიზიტები: მიმღების ბანკი - სახელმწიფო ხაზინა; მიმღების დასახელება - ხაზინის ერთიანი ანგარიში; ბანკის კოდი - TRESGE22; მიმღების ანგარიში/სახაზინო კოდი - 7 0901 7289 (უნდა მიეთითოს ასევე: უმაღლეს საგანმანათლებლო დაწესებულებებში სწავლის საფასური; დანიშნულებაში კი - სტუდენტის სახელი, გვარი, პასპორტის/პირადი ნომერი, ფაკულტეტი, საგანმანათლებლო პროგრამა, სწავლების წელი/კურსი);

3.4. სასწავლო წლის/სემესტრის დაწყებისა და დასრულების (აკადემიური კალენდარი), ასევე აკადემიური და ადმინისტრაციული რეგისტრაციის პერიოდი, განისაზღვრება უნივერსიტეტის სამართლებრივი აქტებით, რომელიც ქვეყნდება უნივერსიტეტის ოფიციალურ ვებგვერდზე (ველში „სწავლა“ და ინგლისურენოვან ველში „სტუდენტის გზამკვლევი“).

#### **მუხლი 4. ხელშეკრულების მოქმედების ვადა და სტუდენტის სტატუსი**

4.1. წინამდებარე ხელშეკრულება ძალაშია სტუდენტის ბსუ-ში ჩარიცხვის შესახებ ბსუ-ს რექტორის ბრძანებაში მითითებული სასწავლო წლიდან (თარიღიდან) და მოქმედებს მის შეწყვეტამდე;

4.2. ხელშეკრულების შეწყვეტის საფუძველია ბსუ-ს სტუდენტის სტატუსის შეწყვეტა;

4.3. უნივერსიტეტის სტუდენტის სტატუსის შეწყვეტის სხვა საფუძველებია:

ა) პირადი განცხადება;

ბ) სხვა უმაღლეს საგანმანათლებლო დაწესებულებაში გადასვლა;

გ) შესაბამისი საგანმანათლებლო პროგრამის ვადის ამოწურვა, გარდა უნივერსიტეტის რექტორის/აკადემიური საბჭოს დადგენილებით განსაზღვრული გამონაკლისი შემთხვევებისა;

დ) საქართველოს კანონმდებლობით, უნივერსიტეტის წესდებით, შინაგანაწესითა და ეთიკის კოდექსით განსაზღვრული სხვა შემთხვევები;

4.4. სტუდენტის სტატუსის შეჩერების საფუძველებია:

ა) პირადი განცხადება (წარმოდგენილი უნდა იქნეს წინა სასწავლო წლის დასრულებისთანავე ან ახალი სასწავლო წლის დაწყებამდე 2 კვირით ადრე).

ბ) ავადმყოფობა;

გ) უცხო ქვეყანაში სასწავლებლად წასვლა, გარდა გაცვლითი საგანმანათლებლო პროგრამის ფარგლებში სწავლისა;

დ) ადმინისტრაციული ან/და აკადემიური რეგისტრაციის გაუვლელიობა;

ე) აღკვეთის ღონისძიების სახით პატიმრობის შეფარდება;

ვ) საქართველოს კანონმდებლობით, უნივერსიტეტის წესდებით, სტუდენტის მოზიდვის შესახებ შესაბამის კომპანიასთან გაფორმებული მემორანდუმით და ბსუ-ს სხვა აქტებით განსაზღვრული შემთხვევები.

#### **მუხლი 5. სხვა პირობები და მხარეთა რეკვიზიტები**

5.1. უნივერსიტეტის სტუდენტის სტატუსშეჩერებული/სტატუსშეწყვეტილი პირის აღდგენის შემთხვევაში, მოქმედებს უნივერსიტეტის უახლესი აქტებით დადგენილი მოთხოვნები.

- 5.2. წინამდებარე ხელშეკრულებით გაუთვალისწინებელ შემთხვევებში მხარეები ხელმძღვანელობენ მოქმედი კანონმდებლობით;
- 5.3. ამ ხელშეკრულებიდან გამომდინარე დავის არსებობის შემთხვევაში, მხარეთა შორის შეთანხმების მიუღწევლობის შემთხვევაში, სასამართლოში მიმართვის ვადა აითვლება უნივერსიტეტის სტუდენტის სტატუსის შეწყვეტის შესახებ აქტის გამოცემის თარიღიდან.
- 5.4. ხელშეკრულება შედგენილია ორ ეგზემპლარად, ორივეს გააჩნია თანაბარი იურიდიული ძალა და ინახება მხარეებთან.
- 5.5. მხარეთა რეკვიზიტები:

**„უნივერსიტეტი“**

საჯარო სამართლის იურიდიული პირი  
 - ბათუმის შოთა რუსთაველის  
 სახელმწიფო უნივერსიტეტი

ქ. ბათუმი, ნინოწვილის/რუსთაველის ქ.  
 №35/32

-----  
 (რექტორის ხელმოწერა)

**„სტუდენტი“**

სახელი, გვარი \_\_\_\_\_  
 პირადი № \_\_\_\_\_  
 ფაქტობრ. მისამთ. \_\_\_\_\_  
 რეგისტრ. მისამ. \_\_\_\_\_  
 ტელეფონი \_\_\_\_\_  
 ელ. ფოსტა \_\_\_\_\_

სტუდენტის მოზიდვის მიზნით ბსუ-სთან  
 გაფორმებული მემორანდუმის (-----  
 -----) მე-2 მხარე („კომპანია“) -----  
 -----

სტუდენტის ხელმოწერა \_\_\_\_\_